

Mey souben que sos, de la tiréte enlà que m'en apariben poumes d'aquères qui-s poudèn goarda dinque à las flous d'abriu. Ô poumè de haut brangàdye que las madurabe, e defendut qu'ère d'en ha cade capbat l'estiu. Arrés n'y touquère, d'aulhous, dinque que pay Francés s'y puyèsse ta las s'amassa, ue per ue, dens û tistalh de costes. Que-m troubàbi aqui enta la coelhude, e à bèts cops, en m'en causin quauqu'ûe de yénce : « Ta qui sera aqueste ? si-m disè ; entau nouste maynat ? » E que la me yetabe : « Pare lou berret, bam se l'ategnes, e se t'y boutes lous « *layroûs dou pâ* » ! que cau que s'y counéguen, eh, sus la poume. » Lèste, que-m tiràbi lou berret ta la gaha. Lous layroûs dou pâ, qu'ous abi touts labéts, e nat d'emproutat (amics leyidous, qu'ey atau qui apèren lous dents d'û nèn per nouste) e, quon lous abi mercats sus la poume, l'ayòu, dab yèstes de countentè, que hasè : « Espiats s'ous a dous soulides ! Abisats-b'y, nou b'anéts deberti à hica-u lous dits à la bouque, que mau b'en saberé.» ...Toutû, aquère amistat prumère, aquet bounur qui semblabe debara dous oelhs dou mé arrè-payran, coume èri dens la soue coumpagnie, que-s debè barreya, e per la mie faute.

Dens lous més sèt ou oeyt ans, que coumençabi de ha balenties e enterpréses dab lous amics escaduts à l'escole. Ô coumpay, mey aban-hèyt que lous auts, que-m hasè ana coum boulè. Més tabé qu'abè deque gagna-m : Que sabè nids de tout ausèt, e que m'en proumetè ta quon houssen plumats e n'aboussén nat besougn de l'adescade dou lou pay e may. Que l'abi coundat qu'enço de Poume, lous més oncoucous que-s debertiben à pesca dens l'agau. Nat besougn de ligne ni d'esparbè : nou calè qu'estanga l'aygue sus la prése dou Gabe, barra las coumportes e, seguin lou briu, gaha las troéytes nideyan debat las pèyres. Quines pèsques nou hasèm tant que lou reyén e s'at abè dab d'outes escouliès e, dab la langue, que-ns en cargabem las bascoyes de pechs à las ales d'aryént pimpalhoats de rouye ! Toute ue semmane nou parlèm d'arré mey, e per û didyaus, u cop disnat, haut ta l'agau de Poume ! ... Que-ns estuyabem per las oumpres e per las estremères. Més, arribats à la pachère, à l'endrèt oun l'aygue e passe dou Gabe ta l'agau, que manquèm de pugnet ta ha bacha las coumportes. Qu'èren croustes qui nou poudoum arrougagna : qu'aboum bèt hica-s y touts dus, lou pés de l'aygue qu'estou mey hort que noustes brassots.